

四庫全書

集部

欽定四庫全書

集部

牆東類稿卷

十九

詳校官中書

臣

閔思毅

主事臣呂雲棟覆勘

謄錄貢生臣苗序瀛

欽定四庫全書

牆東類稿卷十九

元 陸文圭 撰

五言絕句詩

絕句三首

車薪勝盃水輿羽重鈎金物理元無定權衡只在心

買絲繡平原儼金鑄子期君子病無能不病人不知

杜欲誅雲師韓將訟風伯水旱不由天那是詩人責

雪夜不寐偶成短句十首用渭北春天樹江東

日暮雲為韻

丈夫慎出處功成乃身退古人夫何如八十釣清渭
四時循化機萬物隨動息衆星紛熒熒天運齊拱北
縞素製野服誤染京華塵舊業在何處梅花江上春
男兒不得志壯心惜徂年長空起鵬鶚目送入寥天
布衾生淒寒夜夜夢歸去心恐秋風深摧殘紫荊樹
吟苦不成寐寒窻凝夜釭千古誰知心遙遙賈長江
此身如斷蓬飄蕭隨北風錢塘一望地家住西湖東

客慮千萬端長吁愁不出誰能事低首揮盃送白日
幾欲膏吾車老眼不識路弟妹今何之蕭蕭白髮暮
昨日家書至慰我久離羣游子眼欲斷日日望白雲

東風

東風何太急日落黃塵起篝燈吹欲滅驟雨打窗紙

秋塘觀魚

野塘落芙蓉下有潛鱗躍漁多罟日深園園方自樂

戲書所見

雲英捧玉液真是裴郎偶不知幾萬錢買得玉杵臼

送祝君晟湖州提領案牘

幙府今何處青山水遶城烏程有美酒還肯餉春耕

題李義夫無鎖亭二首

清風四無邊曠然此君宅可不問主人不可容俗客
昨日蒼溪叟曾來斫釣竿山童尋鶴去失却報平安

題畫二首

雲巢八十翁觀化得三昧無聲涼月下適意芳草外

物物具天機緣何紙上生有時掛素壁自動亦自鳴

題畫春景

青山多喬木柳枝低婀娜春風在毫端高遷無不可

題月汀圖二首

太陰水之精浴水光愈潔常怪市中人不識沙頭月

露垂蘭葉光風翻藕花影灘前白鷺睡夜半莫搖艇

題畫梨花

淡容露如洗生色春欲動紙帳小屏低同入梅花夢

題碧桃手卷

爛枝空有色飛羽本無情獨立春風裏如聞三兩聲

寫竹

傳神疑有月著色淡無煙此是詩人筆胸中有渭川

題南宮子中畫鶯

金衣何璀璨飛向垂楊樹久立却無聲東風吹不去

題畫白鴈二首

蘆花秋半黃三兩下寒塘北風正蕭瑟書遠不曾將

未曾至鴈門安知食鴈美若讀潛夫論當不保此紙

六言詩

赤壁圖二首

公瑾子瞻二龍文辭可敵武功却怪紫煙烈焰不如白
月清風

烏臺夜雨傷神赤壁秋風岸中此老眼空四海舟中二
客何人

題蕭照山水

閉門十日風雨神遊湘浦峽川樹影分開草店鴈聲吹落漁船

王黃華山水小景二首

試問滄洲漁叟長松山崦誰家終日拏舟不語江風吹老蘆花

此紙無脂粉氣之子有山水淫當時以意模寫今我以目登臨

題鷹捕雀圖

原注其一已擒其一驚去鷹復回顧

一雛已飽毒手反顧又欲其餘大貪得隴望蜀小貪取
熊兼魚

死生命判須臾一去一不得去兩三竹葉成叢被毆復
向何處

題戴嵩牛圖

隴上躬耕力倦歸坐茅齋展卷耳邊如聞笛聲却看牧
童不見

七言絕句詩

讀史六首

逐鹿紛紛盡向秦東門牽犬亦無人月宮穩上青冥去
桂樹秋風老此身

暮年百事已心降床下無人拜老龐病眼欲開還又閉
偷看日影下西窗

曠懷雅思人人有濟世經邦事事無終日醉眠呼不醒
明朝典午代當塗

廣陵琴與山陽笛哀怨千年尚未平正始諸賢零落盡

山王去作晉公卿

曉看嵩少玉嶙峋枉駕應憐處士貧
令尹若能為保障長衾盡覆洛城人

司徒太尉總三公奢儉由來性不同
錦帳羊羔酣未省誰能僵卧里門中

偶作

姦雄往往墮危機成敗安能論是非
空笑狂生投益智絕憐老母遺當歸

偶書

憂時耿耿丹心在無事悠悠白日過
萬里山河音信少
一春風雨悶懷多

舊題

賸得清明一半春
蜂衙蝶使往來頻
東風自動鞦韆索
不見海棠花下人

戲狄懷英

花樣精神月樣粧
妖魂不敢近忠良
如何鳳閣平章老

却事宮中嫵媚娘

己巳新春

鞭春已罷燒燈近十日西風未轉東料得化工無別意
祇因不放小桃紅

年年春色先催柳萬紫千紅次第開零落牆陰人不問
可憐殘雪一株梅

山村示暮春三絕句和韻

懷哉春晚故山薇冉冉江雲日暮低為問柳橋看燕舞

何如松嶺聽猿啼

樵兒拾樵不畏虎
隔溪看花如隔霧
鷓鴣聲在柘崗西
落日腰鑱下山去

畫簾朱箔燕為家
青草門庭只產蛙
一樹櫻桃紅半落
園丁愁殺雨如麻

王祈伊中秋不見月四首

秋空碾上一輪冰
積雨連宵洗更清
縱有浮雲容易散
吹開不待管絃聲

家家望月試停盃怪底濃雲撥不開身入廣寒人不見
却從袖裏裊將來

中秋萬里共陰晴曾記坡翁最善評誰信九霄風雨外
羣仙正賞月華明

開元以後可堪憂秋雨霖霖稼不收此際霓裳歌一曲
君王正在月宮游

臘月二十六日立春

隴梅未寄江南信鄒豢先回燕谷春忽憶少陵巫峽句

菜盤思見玉纖人

丁丑元夕

入夜不聞簫鼓聲千門月色為誰明無端邏騎堦前過

錯認我家樗馬鳴

原注余居與起潛姪相鄰

石湖留題三絕

仙子驂鸞不可呼故園花石久應蕪不知綠野何人買
試問平泉有子無

高築詩壇據越城醉呼楊陸主文盟至今月下蒼苔石

時有先生杖履聲

當年彬父遣詞臣列戟傍觀色怒嗔
穀水曾無歸壁日稽山已有摸金人

望三峯

笋輿咿軋下山田遙指三峯返照邊
安得肉身生兩翅霎時飛過此山前

大茅峯四絕句

懸崖石磴刷苔青空谷無仙鬼亦靈
聞說遊人多好事

誰能扶直半山亭

原注勢傾將壓

風吹天朗見秋毫足力窮時所歷高老子何曾煩一步
輿夫攀陟不辭勞

羊腸九折路盤嶇不覺騰身上太虛失脚從知高處險
西風斜日早回車

一家兄弟入仙門誰把名山鼎足分我讀儒書知長幼
辦香先禮大茅君

露筋娘子廟

玉真僊子雪為膚枉被羣兒識塞酥寂寞扶風三尺土
可憐香火至今無

桃源縣

張家橋西車馬塵北風刮地眯行人籬落枯桃三五樹
不應此地可逃秦

文安縣

平生知己富歐韓辛苦修書博一官自是朝廷重科目
且教主簿到文安

夜宿何莊唐主事宅

扶風豪士不知名，樽酒相逢意便傾。
爭似何莊今夜宿，梅花燭影照三更。

夜宿范以善提舉雲林清遠風大作偶成二絕
句

猿啼夾澗聲逾遠，鶴啄荒苔跡更清。
身在千林頭上立，忽從脚底白雲生。

雲峯頂上玉仙家，誤入脩廊一逕斜。
夜半月寒風力勁，

滿山松影走龍蛇

臨沂沂水道中塵沙眯目不可行聞東北有溫泉即浴沂處不及往

臨沂以北沂水東行人揚袂塵沙中縱有溫泉能自潔
雩壇安得可乘風

除夕二首呈北溪

臘雪窮途一月中明朝老鬢又春風遙知兒女團團處
飲徧屠蘇憶乃翁

杯盤今日偶相逢客路飄飄過一冬為問玉堂春帖子
不知學士有誰供

清明日泊舟甲馬營

細柳東風甲馬營鞦韆花下笑相迎舟中自有傷春客
暗數歸家幾日程

清明

花開花落總無情贏得詩人百感生今日東闌看梨雪
坡仙去後幾清明

宿黃村土人索詩

塵沙終日意昏昏
落日炊煙又一村
客子倦游求止宿
主翁搔首更無言

黃村落日下山低
宿鳥歸林亦倦飛
夜半驅車投北去
誰能慷慨泣牛衣

入京二首

觚稜棲雀五雲深
此日江湖向闕心
朽骨不堪重拂拭
涓人莫枉費黃金

手携布被入關中頗似留川六十翁未必漢廷推第一
不須側目事韓公

舟中追和遜卿早春即事十首

柳色鶯黃蘸碧沙隔溪遙指四娘家故園春事如今晚
可見東欄芍藥花

清江漠漠漾晴沙門對青山買酒家檣外一聲金彈子
流鶯驚起落庭花

莫惜春衫污酒痕欲將遺恨寄芳樽清明客裏匆匆過

不記桃花笑倚門

草色青青沒燒痕
山川滿目酒盈樽
只愁逋客回家日
先被春風緊閉門

乍別親朋似久違
西風塵起染緇衣
不須杜宇聲聲勸
如此江山胡不歸

壯圖落落與時違
不信經綸起布衣
縱使鵑魚從北化
也隨烏鵲向南歸

客至從容奉笑談
晚知蔗境味尤甘
曲江進士題名遍

安用山人起水南

虎溪何必與禪談
唯有東籬菊味甘
束帶肯為兒輩屈
悠然興在此山南

科斗臨池學篆文
燕雛帶雨掠香芹
春閨應恨歸來晚
南浦當時錯送君

草堂未可便移文
自煮清香碧澗芹
更向白雲深處宿
山頭回首謝諸君

賦歸四絕呈句容諸友

興盡歸期漸有涯
夢中昨夜已還家
兒童笑引池西去
菡萏猶餘一朵花

故里青松百尺強
亭亭三徑儼成行
東籬雨後無人葺
舊菊多應一半荒

我與茅君宿有緣
四年五度過山前
元符直下崇禧路
回首三峯意愴然

一見諸賢蓋便傾
秋風猶動故鄉情
餘生無復重來日
再世何當結弟兄

題禹廟

來尋禹穴何容易，却上龍門得許勞。
擬借梅梁浮海去，坐登三級浪頭高。

仲冬雪夜偶書三絕句

城樓戍鼓盡三更，燈射齊窻一黍明。
窻下有人勤不寐，隔牆猶聽讀書聲。

擁衾危坐夜沉沉，門外誰知雪寸深。
掩卷不言空太息，靜中忽見古人心。

長廊風緊雨冥冥
花落寒燈酒半醒
但覺晨光何太早
不知飛霰集窻櫺

諸生和韻復吟三絕

荒城戍卒打殘更
道上無人天未明
一似銜枚蔡州去
只無鵝鴨混軍聲

猿啾鬼哭杳冥冥
夜半何人弔獨醒
訝罷離騷心正苦
陰風吹雨響踈櫺

地鑪無分爇香沉
畫盡殘灰夜正深
窻外梅花消息動

要知子半是天心

自笑

既聾不用誇三耳
純白安能辨二毛
自笑先生書案上
又將論語教兒曹

丁卯新正紀懷四首

懶將詩句上桃符
栢葉椒花一例無
却笑蘭齋元不簡
舟中猶自飲屠蘇

土潤耕牛不受鞭
風和花鳥各忻然
老人猶記兵戈日

自後昇平五十年

紛紛兒女競新年老去思親獨愴然墓上只堪供酒掃
無由綵服拜堂前

魯史曾書雨木冰坤爻切切戒陰凝衡門空把憂時志
無奈華軒盡鶴乘

窺園

先生日日好窺園學圃工夫細討論賣李不須先去核
耘瓜只恐誤傷根

井竭

坎蛙曉渴上苔欄
石甃泥渾底欲乾
焦稼不為簞食計
一瓢飲水亦良難

啓山掃松

一妻一妾閼泉扃
老栢蒼蒼蔓草青
我肯墦間求饜足
魂歸不必訕中庭

病中四絕

南山處士老尤貧
頗恨故交無一人
若使知心得良友

更因多病轉相親

老去無憐病轉多
櫻桃楊柳奈情何
故人又比佳人薄
莫怪門前雀可羅

葉落蕭蕭壅樹根
疎林帶郭半疑村
卧聞車馬墻邊過
無事呼兒早閉門

浪說蘇公久已仙
豈知翁自厭餘年
雪堂二客能相從
姓字當時惜不傳

追和四絕

文士多嬰疾與貧浩然東野即其人唱酬從此詩筒簡
炮炙時於藥裹親

舖餒糟醅醉者多獨醒無柰衆人何寒窻細讀離騷語
遺恨千年弔汨羅

三十尋思擬學仙蹉跎已過古稀年一生只作邯鄲夢
枕上奇方秘不傳

卧看山雲起石根意行隨犬至前村廛居自是無人識
何必移家上鹿門

欽定四庫全書

牆東類稿卷二十

元陸文圭撰

七言絕句詩

丁亥壽藥房先生四首

賀客門關刺莫傳日高厨傳尚蕭然
遙知獨鶴蒼苔舞
自點丹砂註內篇

蜀苑梅花號兩龍千年矯立受霜風
若為健步能移取
遠供寒香壽乃翁

出處窮通若命何月居南斗類東坡底須內翰還公做
勘破已輸春夢婆

曲度珠簾懷呂相廡排紅榜媚韓王先生清隱心如水
消得編詩一瓣香

折梅壽宋春卿

南枝春早為誰容遠供寒香壽乃翁不信廣平心似鐵
能禁索笑倚東風

又口號四首

謹案此詩陸義齋作時乙巳九月前有七言律詩一首編入十八

卷

洛陽亭下昔埋輪當道豺狼不避人今日黃花故園酒
獨携野鶴伴閒身

仁挾翔風勇駕霆皇華使者出祥刑福星一夕遷吳分
却向龍山現壽星

華堂捧勸紫霞盃紅粉回頭御史來直道素知嫌嫵媚
羞將白鶴放籠開

幼安伯可號文雄詞壽秦韓枉自工賢相肯交窮處士

何如魏野祝萊公

贈松憲

故交皆疎柳子厚新貴不識王元之袖中刺字已漫盡
一童猶負囊中詩

贈復初二首

昨夜春風到柳枝客衣偏愛薄寒欺囊錐穎脫無人見
欲繡平原未有絲

有客袖中懷短刺何人門下曳長裾每評陸子毀茶論

大勝顏公乞米書

寧華張尉衛輝人也因寇失官妻子為擄行乞
歸鄉贈以二絕句

葛藟綿綿長道邊獨行踽踽亦堪憐邯鄲正近君鄉里
好借仙翁一枕眠

南來憔悴一身存歸雁哀鳴久失羣莫怪夜行人不問
形容豈似故將軍

桂松巖以子平星禽二術推人多驗戲贈二絕

十二支辰配十干此專主日論財官宜無辭祿安貧者
說與先生仔細看

異類于人總不干止聞列宿應郎官區區女蝠并危燕
却與蛟龍一例看

贈星禽趙顯微詩三絕

顯微元是紫微仙天上星辰手斡旋為向人間多漏洩
謫下茅峯五百年

莫把行藏問斗牛年將八十更何求願言奎宿長明健

文治從今遍九州

奎宿如何號木狼
尾箕虎豹若為詳
獸心人面凡皆是
瑞物如何無鳳凰

和史葯房三絕

莫倚承恩賦上林
記曾薄倖託琴心
白頭又欲輕相背
令魃山眉作苦吟

出處何如漢二疏
返耕聊以遂吾初
虎頭未可輕搖筆
牛角何妨且讀書

春被山顛與水涯盡供物料入詩家陸劉近世升沉異
一為梅花一杏花

和張仲寔絕句四首

江梅歲晚獨清妍南國相逢亦偶然料得知心有寒月
不消重霧與輕烟

平生夢不到黃扉安得京塵染素衣只把一竿江海去
相看鷗鳥亦忘機

十年講席坐無羶盡把行藏付與天策馬已甘之反後

着鞭莫競祖生先

兀坐書林閉董惟時尋佳句寫烏絲兒時論語今忘却
且讓安昌作帝師

山村贈禮敬龍澤上人詩有幾年不踏澄江路
耆舊唯存陸子方之句和二首

西抹東塗銜一鄉阿婆羞憶少年粧如今閉戶無人識
旋學仙翁却老方

西山爽氣入吾詩拄頰含毫有所思欲把求田語玄德

莫因學圃笑樊遲

次伯機絕句

梅天風雨一江寒
溼却灘頭舊釣竿
自著漁蓑沽酒去
路逢賈客問長安

留別袁伯長待制凌德庸少監周南翁待制諸公三絕句

待詔明廷百有餘
一人釋褐向江都
諸生對策無奇語
田實何曾不喜儒

書生骨相太迢迢，地位還須有福人。
老我終身友麋鹿，看君他日上麒麟。

猓猓虎豹守天關，月殿蟾宮不可攀。
歸路春風無限好，一聲啼鳥破青山。

絕句留別善之仲實，併呈松澗雲仲。
無逸四首，今夜征帆淺渚邊。
何時樽酒落花前，白雲遶舍歸心切。
不為春林聽杜鵑。

手拈花草弄春愁，兒女安知稼穡秋。
山北山南游未遍，

歸歟且復事西疇

江上春雲生暮寒故城回首離長安殘桃剩柳應無分
留與諸君取次看

老檜榮枯不計春好花開落止經旬莫將文翰誇餘子
共擬勲名及古人

古意四首寄張可與孫晉卿

長安城頭紅日斜王孫金彈打烏鴉寄聲翠鳳穿雲去
霜寒莫戀梧桐花

長松百尺蔭官街
街吏斧鋸充官柴
高寒自是飽風雪
歲晚只合居窮崖

老翁持鏡向市賣
銅光的皦秋水清
醜婦鑑容驚墮地
想渠嫌殺太分明

牧兒狹徑礙樵枝
樵兒格鬪暮不歸
於菟一聲嘯篁谷
兩兒驚散走如飛

夜得二絕寄子華

送客征衫秋八月
懷人病枕夜三更
床頭稚子呼不覺

金剛已磨全書
卷二十
牕外瀟瀟風雨聲

雞鳴風雨思君子
鴈過瀟湘憶故人
別去情懷渾欲醉
夢回詩筆已如神

絕句二首寄紹堂求巧石

籬根怪石起層雲
淺帶春泥碧蘚紋
乞與詩人時醒酒
也勝豪奪任監軍

幾年石友卧蒼苔
曾受南宮雅拜來
老子暮年行脚倦
只宜窻裏看崔嵬

送唐孟方教授三首

泮水三年惟飲水不知芹藻味何如
羣鴉無故爭桑椹
挾彈何人莫問渠

禦兒溪北浣征衣重拂蒼苔舊釣磯
有弟對床思久別
呼兒置酒話遲歸

城東老圃舊書生緊閉柴門懶送迎
獨袖篇詩與君別
相看白首不勝情

送李義夫出遊二首

梅花卸玉春寒淺柳色描金雪意消老子偶然詩興動
又挑行李過溪橋

三千丈髮從渠脫九十日春須我遊出却草堂三五里
囊中無得一錢留

送吳仲魯回烏江二道

原注吳學易

老人白帽子青衿二水相滋允澤深易學已隨丁氏去
金蘭何日慰同心

黃田西望歷陽城風水蕭蕭數日程紙上陳言刊落盡

滄浪時聽棹歌聲

送留君玉高雲卿自江陰遷松江四絕

二君才幹俱優裕
數載相從意未休
短棹西風吹過泖
相思霜月落南州

江浦買鱸秋正美
山亭聞鶴夜尤清
送君此去因懷古
海水東來意未平

老我卑枝甘伏鷃
羨君喬木又遷鶯
清平官府無公事
分我絲蓴一箸羹

暨州風土今非昔安得珠犀賈客船莫笑歸裝無一物
江頭魚蟹亦論錢

鑒止堂

流水涓涓止水停要令漱玉結層冰深溪不泛桃花出
誰識仙源在武陵

西苑

雪花剪白忘安蒂

原注古詩
雪花無蒂

霜葉雕紅不戀枝爭似隋

家宮樹上四時錦綵不曾離

丘莊多稼樓二首

原注扁庸田
僉事所書

樓上西風野望時
冥冥禾黍沒高低
勸農使者來行水
還凭朱欄憶舊題

萬畝耕耘卒歲勤
可曾一飽慰農人
催租令急如風火
輸入官倉化腐塵

喜客泉二首

幽篁夾道少人居
山骨清寒草木疎
泉見客來空自喜
春懷渺渺正愁余

一飲懷金出嶺南

原注廣東貪泉

蓮花峯下絕清甘

原注廬山貪泉

我

來欲與流泉約獨喜庶人莫喜貪

四時佳興題徐景陽園堂五首

溶溶川上花光冉冉窗前草色春能識此中真樂處
聖門只有兩三人

門前車馬客方散堂下樽罍酒半醒不信鏡中添白髮
君山依舊去年青

窮秋破屋簷頭雨殘臘征夫陌上霜公子閒居無一事

可能憂樂兩相忘

華陽洞口金泉水流入宮牆作小渠任轉秦淮出江去
不應久住化龍魚

半奩玉鏡照鬚眉長笑東坡與水嬉直下琤然投小石
一波先動萬波隨

題園亭

把酒看花貧亦樂携琴對竹靜相宜客來若問朝家事
回首東風謝不知

同善之仲寔無逸共賦雪中香亭

冷雲低壓翠禽巢碎玉玲瓏不耐敲蜂蝶遲來採芳信
暖風已逼杏花稍

鶴皋詩為振之作

鶴鳴于垤婦長嘆鴻漸于陸夫遠征何似山亭聞鶴唳
無人靜坐月三更

劉澹齋求米船謾賦二絕

文士清高數米顛蔡公門下詎能賢探囊萬一逢江盜

錯認真州發運船

靈寶生平愛虎頭
每傍戰艦繫輕舟
晚無書畫真無益
洗手莫嫌寒具油

臨山谷帖不似

曾草華清妙入神
涪翁以後更無人
捧心終是西施好
里婦何緣輒效顰

危金僊示容齋清暉堂詩求跋洪景廬乃危驪
塘之座主也因成二首

卷中人物想乾淳老筆題詩意轉新却怪洪楊交不合
誠齋亦自是詩人

清暉何處有園堂消得先生句發揚百世空留遺墨在
後生併不識驪塘

題敬威卿參政贈許正卿針詩卷末敬公之章
許卿之藝諸君發揮盡矣終以二絕貂續尾蛇
添足乎

江左知名許叔微公來示之衡氣機天下呻吟尚未息

公持肘後將安歸

正人一脉係安危溫公身事亦付醫此身強健無着處
不如枕卧看兒嬉

題李兄課卷

集中有句儘堪傳一夢科名十二年音好空聞永嘉末
命乖不遇竟陵前

題趙子德修屋疏二首

公子王孫逞富豪連雲甲第競相高誰是錦里秋風客

不辦三重屋上茅

神有青囊號救貧如何無術自謀身道南大宅今安在
欲向龍舒覓主人

戲題聽琴手卷

流水高山不用彈巴人下里衆皆懽只今何處求鍾子
多向文闈作考官

題昭君畫卷五絕

當時隨例與黃金不遣君王有悔心近使來傳延壽死

回思終是漢恩深

妍醜何須問畫工美人終日侍宮中
奉春初計真堪恨
欲望單于敬外翁

青塚千年恨不埋琵琶馬上幾時回
宇文高氏爭雄日
突厥柔然獻女來

己恨丹青誤妾身何消更與妾傳神
那知塞北風塵貌
不似昭陽殿裏人

嚙雪中郎妾不如脫身無計謗相於
勸君莫射南飛鴈

欲寄思鄉萬里書

原注畫中有一人射鴈

題二喬手卷二絕

國色嬌嬈畫不如風流二壻儘消渠
阿承醜女無人聘
自挈衣裝過草廬

小郎斫案怒生嗔
亞壻提兵算若神
借使橫江風不便
可能銅雀鎖佳人

淵明像

宋文心腹寄王宏來刺江州却有聲
不怪孤臣書甲子

時時送酒賞淵明

小銅屏鑄淵明歸去詩并坡和章以贈子華侑
以絕句

五斗區區肯折腰眉山早計不如陶小屏一枕還鄉夢
五柳門前月正高

移居圖二首

潛夫兩跋最窮研通老安身是契玄偶向晴牕展臨本
無人當日扣龍眠

細君散髻抱嬰兒底事移家不皺眉有句曾嘲窮處士
四婆元自解吟詩

江陰有桃源圖方圓尺許宮室人物如針粟可
數相傳有仙宿民家刻桶板為之一夕而成明
日遁去友人以本遺余戲題二絕

不自柴桑記裏來似傳晨肇入天台世間多少荒唐事

何獨神仙有是哉

原注韓詩桃源之說誠荒唐

人說桃源是隱民神仙幻景即非真如何谷口漁舟路

不許人間再問津

原注洪駒父諸人論桃源謂陶記中本言避秦者初非仙也東坡荆公詩

得之如王摩詰退之夢得皆誤然余考之本記亦有可疑如漁人回舟竟不能認前路後有問津者輒死桃源果在世間何不可復見耶

題子昂學士小景

蕭蕭落木壞無枝
冉冉細竹愛風飈
疑非松雪齋中畫
似是唐人野望詩

馬道士為詹仲明作柳城春色圖
城門外柳樹連堤桃花夾竹
小橋漁艇茅屋下有讀書人不

知何處景也為題二絕

渭城客舍柳煙遮
漁叟桃源去路賒
松竹林中讀書處
一圖風景屬三家

城外春風野水渾
橋頭雙槳下孤村
柳桃紅綠撩人眼
獨坐書齋懶出門

題牡丹梨花手卷

沉香宴罷索人扶
重向銀屏觀雪膚
一笑不償千古恨
玉環當日倚闌圖

王隱齋墨梅

曾看月下挂疎影更憐雪後折橫枝
逋仙此詩真是畫
王生非畫却成詩

題補之梅

含章殿裏雪中開曾共君王索笑來
着在荒蹊枯竹畔
可知准勅號村梅

題扇有所贈

圓如寶月潔如霜素手輕搖玉體涼
報道明朝秋節至

金谷園
姝好無復望專房

亭下玉蘭花開

初如春筍露纖嬌
拆似紅蓮白羽搖
亭下吟翁步明月
玉人虛度可憐宵

梨花

粉香初試曉粧勻
花貌參差是玉真
菲屋詩人嗟老去
東風勿送一枝春

枯松

誰見當年長髮鬚變成龍虎卧交衢雖然擁腫無人問
投老猶堪作大夫

鹿慈絕句

丹葩信不類葦蒿雨後常抽綠玉條此草宜充鹿食

瘦莖却比沈郎腰

原注沈約作鹿慈詩云爾非葦與蒿
豈充鹿食饒者取此詩以白梁武

帝大怒約以憂死今按此詩亦未見顯然譏刺何為得
罪但此花丹色畧有斑點似鹿紋所以得名非謂可以
供鹿之食也

詩餘

點絳脣

情景四首

玉體纖柔照人滴滴嬌波溜填詞未就遲却牕前繡
一幅花箋適與何人手還知否孤燈坐守漸入黃昏後
笑靨多羞低頭不覺金釵溜憑媒將就鳳枕回雙繡
月地雲階何日重携手心堅否齊眉相守願得從今後
永夜無慄更堪點滴聽簷溜枕寒難就堆亂床衾繡
人面桃紅還憶擎漿手君知否倚門獨守又是清明後

悶倚香腮淚痕一線紅膏溜將身錯就枉把鴛鴦繡
柳帶青青攀向行人手天知否白頭雙守破鏡重圓後
王仲謙席上歌者魏都惜求子華寫真為賦
小立娉婷歌聲低遏行雲住不勝珠翠玉面慵梳洗
除却姚黃魏紫誰堪比君描取卷中人美得似崔徽未

浣溪沙

次伯機

翠玉峯高鷺點明穀紋波動鴨雛生湖山宜雨又宜晴

金定已應全言
卷二十
越女蕩舟蓮葉碧裴郎駐馬柳陰青折花調客訴衷情

減字木蘭花

庚申六月三日同耶律君璋趙子淵兄弟避暑飲于玄妙觀之荷池君璋不飲命歌者歌以勸之

雙鬟聳翠低護金蓮裙牽地鑊石心腸無奈梅花一點香
歌聲梁繞流水泠泠雲杳杳白髮劉郎對景須拚

醉一場

即席贈歌者夏奴

香肌玉潤花前忽聽流鶯韻移步金蓮斜轉清眸踏舞筵
困嬌無力蜀錦纏頭拚百尺安處奴鄉且住容山
過夏涼

阮郎歸

舟中賦所見

風吹一捻柳腰輕春柔力未勝眉兒喜學遠山青終朝

畫不成 嬌滴滴笑盈盈雛鶯葉底聲花梢雨過夕陽
明無情漸有情

臨江仙

坐客有出寵歌者乃主人舊所懽也

聽得雅歌珠一串颯然吹動梁塵樽前重見舊時人主
人情未重情重是嘉賓 飛絮落花無定在近前遮莫
誰嗔文園倦客最傷神野亭何處泊空憶畫堂春

唐多令

梅隱菴席上贈歌者

花下笑聲微鶯喉高又低怪穿花粉蝶成圍唯有禪心
清似水相對坐兩忘機莫道絮沾泥狂風也解飛恨
殘春九十將歸回首陽臺雲縹緲愁薄暮雨霏霏

寄遠

明艷注秋波輕鬆綰髻螺怕逢人先斂雙蛾怯雨羞雲
情未穩佳會少遠離多梁遶憶清歌蘭舟肯再過為
他垂淚染香羅欲倩鱗鴻將錦字知別後意如何

滿江紅

送理伯雍同知改除轉運判官

雙檜堂深想前日清風猶在纔半載政聲傳播與人稱
快鞠草園扉無滯訟憇棠田舍留遺愛問方今循吏幾
何人公為最明而恕廉而介官易進身難退苦簿書
叢委米鹽繁碎鴈鶩自憐羣裏聚龍豬不計兒時會望
美人又向碧雲西徒增慨

贈歌者

兒女多情頗自恨風雲氣少春夢裏鶯啼燕語瞥然驚
覺寸寸凌波蓮步穩彎彎拂黛山眉峭似紅雲一朵罩
江梅天然好舞腰細歌喉巧茵錦褪梁塵繞更盈盈
笑靨櫻唇紅小金盞愛從心裏換玉山偏向懷中倒柰
劉郎前度看桃花如今老

己巳二月二十二日游北門有感

試檢春光都不在槿籬茅屋荒城外
牯眠衰草鴉啼枯木黃染菜花無意緒
青描柳葉渾粗俗憶繁華不似少年

遊傷心目 棠塢錦梨園玉燕起舞鶯簧曲艷陽天輸
與午橋金谷行處綺羅香不斷歸時絃管聲相逐怕夕
陽飲散近黃昏燒銀燭

減字木蘭花慢

滕王閣

九皋明月夜跨一鶴赴仙都聽佩玉鏘鳴驂鸞小駐高
閣凭虛萋萋草生南浦興未闌歸去東吳笑指尊前二
客昨宵良會非歟 莊周蝴蝶兩蘧如變化一華胥嘆

物換星移壺中日月鏡裏頭
顧芳洲獨醒人在采芙蓉
歲晏孰華予欲汎蘭舟
容與煙沙漠漠重湖

和心困春雪詞

怪東風太早未燈夕放瓊花
是何處瑤姬來看玉樹光
彩交加野人但知三白喜
新年天意薦休嘉肯念兵屯
北塞誰上表賀南衙
西斜日影簷牙又被黑雲遮
嘆病骨支離別懷蕭索空負年華
鰲山已成春夢歸去來
空谷卧烟霞却笑昌黎才子浪吟
逐馬隨車

念奴嬌

贈韓茂林

原注魏公之後

茂林修竹自山陰會散幾番陳迹修禊年年春故事懊
恨風流非昔當日蘭堂後來菊圃苗裔江南北覩君雅
號恍然舊事重憶歲晚木落天寒黑貂將敝尚作新
豐客星斗胸中空燦爛磨蝎虛名何益袁呂相逢知音
一笑肉眼無人識訪予梅屋談天聊慰孤寂

酹江月

贈王道人性初歸茅山

芙蓉城郭有羽仙騎鶴來從何處曾拉茅君峯頂會瑤
佩隨風吹去玉笈偷開青囊拾得笑看人間世歲身壺
裏箇中別有天地共約手種蟠桃綴花結實已是三
千歲欲鱸長鯨麟作脯倒海聊共一醉偶憶寒梅更慚
小草拂袖懷歸計蓬萊清淺雲帆他日相遇

送幕職

殘花剩柳正啼鶯聲裏郵亭別館三疊陽關聽未徹手執

離盃引滿政坐諸君久煩老子今日纔蕭散翩然歸去
故園綠樹春晚 人世蒼白浮雲自舒自卷不入高人
眼官事如麻何日了輸與閑中不管翠栢臺高紫微省
近別有清華選功名歲晏江城回首天遠

洛陽耆英會二首

戴花劉監算耆英會上與吾同歲伊洛山川今如古人
事幾番興廢夢枕初殘黃梁未熟已換人間世簞瓢鍾
鼎看來一等滋味 天上赤白雙丸東來西往出沒真

兒戲惟有神仙長年訣長似功名富貴欲擣玄霜難尋
玉杵何日藍橋遇裴郎老矣雲英那肯隨去

延年有術餐古松根下茯苓千歲縱是延年知何益命
也道之將廢思古之人詞章節行杲杲行當世遺風流
韻淵然尚有餘味無奈先哲凋零後生坦率多以儒
為戲每笑唐人書不讀直把黃金買貴山澤奇才雲林
真隱沒齒何曾遇人生如夢江流日夜東去

水龍吟

次葯房韻

西州玉局飛僊袞裳曾侍槐龍翠飛花麗曲雅音猶在
有人賡未千載峨峯一江川練又鍾清氣嘆瀛洲路近
罡風吹斷謬自有凌霄意 草碧寒窻靜裏折瓊枝小
欄同倚新吟婉美西施態度慵原闕梳洗按羽調絲雪兒
薄相為君心醉恨高樓暮隔江城花暗碧雲遙睇

附史葯房作

并序

清明後浹日過子方小飲簾櫳靚深綠陰晝寂欄

邊玉茶正花香韻蕭遠主人出侍人彈琵琶侑觴
酒未終上馬徑去恍然藍橋湓浦之遇也賦水龍
吟以記其事呈子方一笑

等閒過了清明草痕深一庭新翠光風信息牡丹初
褪茶醺猶未燕語清圓梅英鬆潤困人天氣笑文園
倦客詩材減盡猶有傷春意別有留春去裏小房
櫳玉英雙倚天香浮動銖衣乍試鉛華盡洗一曲琵琶
輕攏挑撥未觴先醉又忽忽上馬藍橋路隔謗增凝

睇

再次韻一首寄葯房

燕芹香老春深微風颭動新篁翠驚敲夢斷忙呼小玉
故人來未香縷篩簾游絲墮几暖薰花氣問春隨鶯到
又隨燕去誰解得東君意 澗水流紅影裏小樓東有
人孤倚殘桃着雨鬢容撩亂未堪粧洗冉冉年光悠悠
時事不如沈醉更韋娘一曲司空慣見也應回睇

探春慢

和心淵己巳元夕韻

細草黏冰疎林補雪衰翁未覺春暖曝背低簷燎衣
破竈誰識舞臺歌館樂事如今懶謝鄰伴東招西喚何
消看試華燈月光今夕圓滿念昔繁華帝里侍鳳輦
夜遊曉棚人散迓鼓方催韻簫正美忽被西風吹斷菽
菽梅花落忍聽得一聲羌管懷古傷情淚痕溼春衫短

沁園春

送李同知之官鄴都

東西二都史載循良不五六人記南陽有名潁川有霸
并州如郭河內如恂直比朱絃清侔古鏡吏自秋霜民
自春如公者守廉平二字近古名臣 棠陰手種方新
又五馬翩翩鄴水濱想臺高銅雀尚留遺跡堂深畫錦
空鎖凝塵琴瑟從容雅歌緩帶美政遙知達紫宸期年
後看快行宣召班冠廷紳

送楊伯可

雨足江臯月滿中秋使客將歸看扁舟空載負無長物

破囊收貯富有新詩清白傳家懷金不受潔已從來畏
四知民何幸盡相安田里樂業熙熙誰知經界良規
是三代相傳古法遺要講明有素施行不擾寬嚴相濟
表裏無私慙愧偏州久淹老子却怪朝家選用遲公今
去定致身鴈序接武龍墀

金縷曲

代送同僚

乍到蓉城路聽兒童歌謠德政感恩如父好入西京循

吏傳誰道今人非古留遺愛甘棠佳樹節操冰霜清凜
凜看和風吹作陽春雨程去速遽如許我來不見空
懷竚望彼美碧雲莫合草萋南浦信是有才供世用敢
擇東西何處又誰念嬰兒思乳不恨使君吾不識恨使
君不與吾相輔聊寄意短長句

